



Agid da muntogna s'engascha a Siat

Ina malsogna ha miss en pitgira la famiglia purila dad Arno Casanova a Siat.

2



La citad da Moutier antruras ed oz

La citad da Moutier en il Giura bernais vul ir tar il chantun Giura. En dus onns è votaziun.

11

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Guido Tognoni e sia rolla dubla

■ (rtr) Il Grischun Guido Tognoni, criticher da la Fifa cun aut preschientscha mediala, n'è betg uschè independent sco el sa dat. Tognoni represchenta Najeb Chirakal avant la cumissiun etica da la Fifa, sco che la «SonntagsZeitung» scriva. Chirakal è stà il maun dretg da Mohammed Bin Hammam, l'um ch'è en il center da l'affera davart la surdada dal campinadi mundial 2022 al Qatar. En ina posiziun scriva Tognoni ch'el haja surpiglià il mandat

avant intgins mais ed i saja in «servetsch d'ami per insatgi che na possia betg prestar in advocat e che na saja betg abel da sa storscher». El na gudogna nagut vi da quest mandat. El na sappia era betg tge che vegnia reproschà a Chirakal, el n'haja gi nagin'invista en las actas.

Guido Tognoni na vesa betg in problem per sia independenza en sia lavur. L'ultim temp ha el attatgà pliras giadas la cumissiun etica da la Fifa.

Tavanasa expona, conta e fa teater

Venderdis proxim ei vernissascha dall'exposiziun e premiera dil teater dad «Oh Tavanasa»

DA HANS HUONDER / ANR

■ «Ina story denter sulegl ed umbriva». Aschia senunnan l'exposiziun ed il teater musical el liber che vegnan presentai siat gadas a Tavanasa. Organisateurs, acturs e musicists ein semtgai per quei grond arranschament. Ils vischinadis da Danis e Tavanasa san festivar uonn il giubileum da 1250 onns. Quei anniversari ha ina gruppa da persunas entuorn Rino Caduff, David Flepp, Conradin Klaiss, Annadora Friberg e Susan Rupp vuliu commemorar en ina fuorma tut speciala. La historia dils dus loghens duei numnadamein reviver d'uront rodund duas jamnas. El center digl arranschament che festivescha premiera venderdis proxim stat in'exposiziun davart la historia a Tavanasa. Cheu reviva il mistregn d'antruras. Fatschentas, stizuns ed ustrias da pli baul vegnan aviantas. Il teater musical che vegn presentau ad Isletta va medemamein ella direcziun dalla historia dil vitg. El center stat il kiosk. El ei la porta al grond mund. Quei teater vegn daus biling, il romontsch sebrat-



Gabriel Derungs e Silvio Dietrich (da sen.) amiez las emprovas dil teater musical.

FOTO H. HUONDER

ta cul tudestg. Sin la piazza da ballapei ad Isletta ei vegniu erigi per quei intent ina tribuna cuvretga cun plaz per 320 persunas. Las davosas preparativas ein sin rucca, entochen mardis pro-

xim duess era la tecnica esser installada. Las preparativas pil project han cuzzau bunamein dus onns. Il comite d'organisasiun spetga rodund 2000 visitadoras e visitaders da lunsch e da

manivel. Tenor il president dil comite d'organisasiun Rino Caduff ei la mesadad dils bigliets vendita.

> PAGINA 3

La meglia nota per Anja Furger

DA HANS HUONDER / ANR

■ Il venderdis ei vegniu surdau ils diploms a differentas partiziuns da scola dil Center da formaziun Surselva. Anja Furger da Cumbel ha contonschiu la meglia nota. Alla Lumneziana ei reussida l'excellenta nota finala da 5,7 ella scola media mercantila. Il praticum ha ella absolviu tier il Departament federal per fatsg digl exteriur a Berna. Daco gest leu? «Jeu sundel s'annunziada via online ed haiel giu il cletg da vegnir eligida en quei praticum», di Anja Furger. A Berna ha ella era saviu guder

siu hobi, il ballapei. Ella ei vegnida recepida ella squadra da 2. ligia da Femina Kickers da Worb ed ha schizun saviu trenar leu cun la squadra dalla ligia naziunala B. Anja Furger stat fideivla pil mument a Berna. Leu absolva ella igl onn vegnent la passarella, in onn supplementar da scolaziun per contonscher la matura gimnasiala. Alla fiasta da diplom ha il CEO dil Spital regional Surselva, Urs Kellenberger, fatg entgins partrags davart igl emprendissadi ed igl avegnir suenter quel.

> PAGINA 5



Anja Furger ha contonschiu la nota 5,7 alla scola media mercantila.

FOTO H. HUONDER

Darcheu cuors da stà per la magistraglia a Sent

■ (anr/fa) Cuors da perfecziunamaint pella magistraglia han lö normalmaing a Cuira o amo plü dalöntsch, giò la Bassa. A la magistraglia da Sent esa gratià fingià pella seguonda jada da spordscher cuors eir illa periferia. Ils cuors da perfecziunamaint chi vegnan dats fin in lündeschdi a Sent vegnan acceptats da la Scol'auto pedagogica dal Grischun. «Grazcha a quai nu vaina partecipants be

da la regiun e da l'ulteriu Grischun chi sun gnüts a noss cuors, dimpersè ün pèr eir sü da Svizra bassa», s'allegra Maja Bischoff, magistra dal s-chalin ot a Sent. In tuot frequainta üna novantina da partecipants ils cuors da stà in Engiadina Bassa. Sco l'on passà sun eir ingon da la partida diversas magistras e divers magisters aint dal Partens.

> PAGINA 7



Adriano Iseppi ha muossà als partecipants dal cuors da tuotta sorts exercizis e gös chi's po far cul velo da muntogna.

FOTO F. ANDRY

Chanzuns e suns da citra a San Niclà

■ (anr/fa) Jachen Janett e sias figlias Sara Bigna e Mirella han dat ün concert illa baselgia da San Niclà. Hedi e Hans Eggimann tils han accompagnats a la citra d'arpa e sunà eir aignas cumposiziuns. Il concert dal trio vocal dal bap Jachen Janett e sias duos figlias Sara Bigna e Mirella ha attrat in venderdi saira a bleras amaturas ed amatuors dal chant. La baselgia da San Niclà d'eira oc-

cupada plainamaing. Da far ün terzet vocal cun sias duos figlias d'eira, sco cha Jachen Janett ha dit, ün giavüsch ch'el vaiva fingià plü lönch. Invidà ha'l eir a Hedi e Hans Eggimann da Zuoz da gnir eir els a San Niclà e sunar la citra d'arpa. Il pèr ha laschà dudir aignas cumposiziuns, per part ha el eir accompagnà il chant.

> PAGINA 7



Sara Bigna Janett, qua pro ün solo, chanta in avuost i'l chasè da Haldenstein ill'operetta «Die Fledermaus» da Johann Strauss.

FOTO F. ANDRY

Mezca e mazlaria a Trun

■ (anr/hh) Il venderdis suentermiezdi han las lavurs da baghegiar per la nova mezca e mazlaria a Trun entschiet. Il baghetg vegn realisau dalla ImmoTrun SA ed affittaus silsuenter dil mazler Ivo Nay. Naven dil schaner eis ei previu da mazzar rodund 750 animals per onn. Las investiziuns da rodund dus milliuns francs el baghetg niev ve-

gnan curcladas cumpleinamein da privats. Cun quei engaschament vulan els promover plazz da lavur e perscher als mazlers e purs dalla regiun la caschun da laschar mazzar ils animals a Trun. Cheutras duein era ils viadis cun ils animals en mezca vegnir teni aschi cuorts sco pusseivel.

> PAGINA 5



10027

Servetsch d'abunents e da distribuziun: tel. 0844 226 226 mail: abo@somedia.ch